



Broj: 05/8-50-14-465-3/15

Sarajevo, 24.7.2015.

PREDMET: Informacija o učešću na Međunarodnoj konferenciji „Transparentnost i odgovornost za djelotvoran nadzor: uloga parlamenta“

U organizaciji Narodne skupštine Republike Srbije, srbijanskog ogranka Globalne organizacije parlamentaraca za borbu protiv korupcije (GOPAC) i Razvojnog programa Ujedinjenih naroda (UNDP) u Srbiji, te uz podršku Švicarske agencije za razvoj i saradnju (SDC), u Beogradu je 21. i 22.5.2015. održana Međunarodna konferencija pod nazivom „Transparentnost i odgovornost za djelotvoran nadzor“.

S ciljem razmjene znanja i iskustava u provođenju efikasnog nadzora nad radom izvršnih vlasti, s posebnim naglaskom na kontrolu javnih finansija, Konferencija je okupila predstavnike parlamenata zemalja Jugoistočne Evrope i Centralne Azije, među kojima su učestvovali i članovi Parlamentarne skupštine Bosne i Hercegovine (PSBiH) - delegat u Domu naroda PSBiH i član Komisije za izbor i praćenje rada Agencije za prevenciju korupcije i koordinaciju borbe protiv korupcije Darko Babalj, te poslanik u Predstavničkom domu PSBiH i predsjedavajući Komisije za finansije i budžet ovog doma Predrag Kožul.

Na samom početku učesnike skupa pozdravili su potpredsjednik Narodne skupštine Republike Srbije Veroljub Arsić, direktorica Ureda Švicarske agencije za razvoj i saradnju u Srbiji Izabel Perih, te stalna predstavница Razvojnog programa Ujedinjenih naroda u Srbiji Irena Vojačkova-Solerano.

Otvarajući Konferenciju, poslanica u Narodnoj skupštini Republike Srbije i predsjednica Izvršnog odbora Globalne organizacije parlamentaraca za borbu protiv korupcije Olgica Batić naglasila je da je korupcija jedna od najvećih opasnosti i izazova u globalnim razmjerima, koja ometa održivost i razvoj privrede, ugrožava socijalnu sigurnost i pravičnost, te podriiva pravnu državu i narušava odgovornost vlade i povjerenje javnosti u institucije. Osim poslanice Batić, u okviru panela na kojem je raspravljano o značaju vodeće uloge parlamentaraca u procesu promocije svijesti o borbi protiv korupcije, učesnicima Konferencije obratili su se i izvršni direktor GOPAC-a Akaš Maharaj, predsjedavajući GOPAC-ovih ogranaka u Azerbejdžanu Ali Huseinli i u Albaniji Namik Dokle, te poslanici u Narodnoj skupštini Republike Srbije Dubravka Filipovski i Zoran Babić, koji je ujedno i prvi predsjednik GOPAC-ovog ogranaka u Srbiji.

Tokom panela na kojem je raspravljano o potrebama parlamenata za transparentnošću, dostojnošću i parlamentarnim integritetom u borbi protiv korupcije, a kojim je moderirao potpredsjednik Narodne skupštine Republike Srbije i član GOPAC-ovog ogranka u Srbiji Vladimir Marinković, učesnicima Konferencije prezentirani su: gruzijska Deklaracija o otvorenosti parlamenta u okviru partnerstva za otvorenu upravu, zatim trendovi parlamentarnog razvoja u pogledu transparentnosti, te parlamentarne regionalne mreže u Evropi i Centralnoj Aziji.

Do kraja prvog dana Konferencije razgovarano je i o nadzoru nad finansijama i proširivanju nadzorne uloge putem inovativnih pristupa, kao i nadzoru nad trošenjem javnih finansija, s ciljem smanjenja korupcije. Prikazani su i preduslovi za dobar parlamentarni nadzor prezentiranjem Zakona o Narodnoj skupštini Republike Srbije i Poslovnika o radu. Do kraja ovog panela učesnicima Konferencije prezentiran je i rad tzv. Supervizor portala, koji je uspostavljen u okviru Komisije za sprečavanje korupcije Republike Slovenije.

Drugog dana učesnici Konferencije predstavili su primjenu zakonodavstva, institucije i mehanizme za borbu protiv korupcije u svojim državama. Tom prilikom član Komisije za izbor i praćenje rada Agencije za prevenciju korupcije i koordinaciju borbe protiv korupcije Darko Babalj prezentirao je važeća zakonska rješenja koja se na polju prevencije i borbe protiv korupcije koriste na državnom nivou vlasti u BiH, posebno apostrofirajući Zakon o Agenciji za prevenciju korupcije i koordinaciju borbe protiv korupcije, kojim je u Bosni i Hercegovini uspostavljena ova agencija, kao nezavisna i samostalna upravna organizacija, koja za svoj rad odgovara Parlamentarnoj skupštini BiH. Babalj je tom prilikom istakao da je istim zakonom u PSBiH uspostavljeno i radno tijelo koje vrši parlamentarni nadzor nad radom ove agencije - Komisija za izbor i praćenje rada Agencije za prevenciju korupcije i koordinaciju borbe protiv korupcije, te ukratko učesnicima predstavio sastav ovog tijela i njegove nadležnosti. Dalje, govoreći o zakonodavstvu, naglasio je i činjenicu da su upravo članovi ove komisije bili inicijatori do sada jedine izmjene i dopune Zakona o Agenciji za prevenciju korupcije i koordinaciju borbe protiv korupcije, kojima su riješene određene pravne nejasnoće i nedorečenosti prvobitnog teksta Zakona. Također, istakao je da su poslanici i delegati u PSBiH u proteklom mandatnom periodu bili inicijatori Zakona o zaštiti lica koja prijavljuju korupciju u institucijama Bosne i Hercegovine, a kojim se uređuje status lica koja prijavljuju korupciju u institucijama BiH, kao i pravnih lica koja osnivaju institucije BiH. Kako je naglasio, kao razloge za donošenje ovakvog zakona PSBiH je prepoznala potrebe koje proizlaze iz većeg broja međunarodnih dokumenata čija je potpisnica Bosna i Hercegovina, a tu u prvi red spadaju Konvencija UN-a za sprečavanje i borbu protiv korupcije, zatim Rezolucija 1729 Parlamentarne skupštine Vijeća Evrope iz 2010. godine, kao i Krivičnopravna i Građanskopravna konvencija o korupciji Parlamentarne skupštine Vijeća Evrope.

Govoreći o mehanizmima za borbu protiv korupcije na nivou Bosne i Hercegovine, Babalj je naveo da je Vijeće ministara BiH dalo saglasnost i usvojilo novu Strategiju i Akcioni plan za borbu protiv korupcije za period od 2015. do 2019. godine. Kako je istakao, nova Strategija i Akcioni plan predstavljat će smjernice za rad Agencije za prevenciju korupcije i koordinaciju borbe protiv korupcije u narednih pet godina, a time i parlamentarne komisije koja prati rad

ove agencije. Nadalje, prezentirajući mehanizme za borbu protiv korupcije u PSBiH procesom transparentnosti, naveo je primjer projekta pod nazivom „Otvoreni parlament“, koji se u PSBiH realizira već posljednjih deset godina. Naglasio je da je u tom periodu kroz zgradu najvišeg zakonodavnog organa u BiH prošlo više od 18.000 građana, kojima je prezentiran rad Parlamentarne skupštine BiH i koji su nerijetko imali priliku da o svim otvorenim političkim pitanjima razgovaraju neposredno s poslanicima i delegatima u ovom parlamentu. Također, istakao je da građani BiH na internetskoj stranici PSBiH mogu pratiti veb-prijenos sjednica oba doma državnog parlamenta. Osim toga, sve odluke koje su donesene u vezi s bilo kojim zakonom, izvještajem ili nekim drugim dokumentom u Predstavničkom domu, Domu naroda ili nekom od radnih tijela ovog parlamenta, objavljuju se na internetskoj stranici PSBiH, što dovodi do zaključka da rukovodstvo PSBiH, poslanici i delegati, te predstavnici stručnih službi PSBiH dosta svoje energije ulažu u proces transparentnosti i kontinuiranog unapređenja rada PSBiH.

Osim predstavnika PSBiH, u okviru ovog panela učesnicima Konferencije obratili su se i predstavnici nadležnih komisija iz parlamenata Srbije, Crne Gore, Moldavije, Ukrajine i Azerbejdžana, a razgovarano je i o odnosu Narodne skupštine Republike Srbije i nezavisnih nadzornih tijela, kada su se učesnicima, osim narodnih poslanika, obratili predstavnik Savjeta Državne revizorske institucije, te pomoćnik direktora Agencije za borbu protiv korupcije Republike Srbije.

U okviru prezentacije partnerstva civilnog društva i parlamenta u borbi protiv korupcije, prikazom indeksa percepcije korupcije, te projekta „Otvoreni parlament“, predstavnici nevladinog sektora u Srbiji prezentirali su iskustva saradnje svojih organizacija s Narodnom skupštinom Republike Srbije.

Na kraju, kao rezultat dvodnevnog rada Konferencije, potpisan je Memorandum o saradnji između prisutnih predstavnika parlamenata, kojim se uspostavlja zajednička platforma za saradnju i međusobnu koordinaciju, a s ciljem razmjene najboljih praksi u vezi s promocijom principa transparentnosti, odgovornosti i nadzora parlamenata nad javnim finansijama.

Cjelokupan tekst Memoranduma o saradnji je u prilogu ove informacije.

ČLAN KOMISIJE

Darko Babalj

Prilog:

- Memorandum o saradnji između članova parlamenata u promoviranju razmjene znanja i jačanja transparentnosti i odgovornosti u Jugoistočnoj Evropi i Centralnoj Aziji

Dostavljeno:

- naslovu,
- a/a.